


ignazio maiorana

faiddi



ila palma

C'è puisia e puisia...

Quannu va a gabinettu,
s'assetta e s'arricrià,
puru chissu pi qualcunu
po' essiri puisia.

Puisia cu li stivala

Nun vi faciti meravigghia
Si la me puisia è senza pruvigghia:
finu a quannu camina
n-menzu a li vattàla,
'nveci di la scarpina
ci mettu li stivala.

Viva sta generazioni!

Pensioni,
disoccupazioni,
cassa integrazioni...
E unn'è la produzioni?
Viva sta generazioni!

L'omu, la fidi, l'amuri

Di l'omu nun viju l'omu,
ma la so maschera.
E st'omu va n-cerca
di la fidi
aggrappatu a la spiranza
di truvàri l'amuri.

Cuntrastu d'amuri

La luna, cu grazia,
'mbriàca la marea
e lu ventu, gilusu,
la strapazza d'amuri:
ddu mari, a taliàllu di vicinu,
mi fa paura e m'innamura.

Sugnu...

Vuliti sapiri
cu cui sugnu,
comu sugnu
e 'nzoccu sugnu?
Sugnu assemu a mia,
sugnu comu a mia,
sugnu ju e basta!

Etna

Ciumi, trascinatillu puru
st'autru fazzulettu di terra
vagnatu di suduri!
Tantu, lu nostru distinu
è sempri lu stissu:
zappamu sta crusta
timpistata di lu ventu
e tu, ciumi, ti la porti a mari.
Di sutta resta la dura roccia
chi coci a lu sulì.
Focu di supra e focu di sutta,
la "sarsa" vuddenti di Mungibeddu
sbuffa, l'accarizza e
conza ancora sta terra sfurnata.

Frevi

Mi sentu 'ntra la testa
lu sangu martiddiari.
Mi sentu chiù sbattutu
di l'unna di lu mari.

La carriera

Cu mani e pedi a grancicuni
Si' aggrappatu a lu scaluni,
ma si ti dugnu 'n-ammuttuni
n'acchiani deci di scaluna!

La collana

La portu a lu coddu
e nun la vogghiu staccari.
La truvaiu nta la spiaggia,
mi la regalau lu mari.

La luna

Lucenti cumpari,
ma stanca di scùrriri
la nostra cruna,
scumpari la luna.

La notti, chiù bruna,
ni cummogghia e ni pirduna.

La maschera

Na vota sula all'annu
l'omu si livava la maschera:
pi Carnilivari.
Quannu era sicuru
ca nuddu lu riconuscìa
allura si presentiva e parrava
comu dintra l'animu
risultava veramenti.
Ora mancu di Carnilivari
l'omu si vesti chiù
e la maschera la teni misa.
Perennementi.

La spiranza

Dintra lu cori
tegnu vivu un fucularu:
lu munnu avissi un jornu
la forza di canciari!

Patria vinnuta

A parmu a parmu
vinnitivillu tuttu
ssu jardinu ch'è l'Italia!

Si lu sapissiru
ddi migghiara di morti
ca l'accattaru cu lu sangu,
vi manciassiru lu cori!

Spermatozoi

Cu iddi nasci la lotta
a cu' arriva prima,
la lotta pi la sopravvivenza.

Si nun aviti lu microscopiu,
taliàti li spermatozoi crisciuti,
sparsi pi lu munnu
a continuari li sciarri
pi la propria salvezza
e la fregatura di l'autri.

Semu lu fruttu
di dda corsa dispirata
versu l'òvulu di la vita,
tra miliuna di fratuzzi
ca cercanu tutti la stissa cosa.

Vecchiu furgiaru

Unu a lu ferru e nautru a tia,
quanti corpi t'aju datu,
'ncudini mia!

Focu, tinagghia e marteddu,
marteddu, tinagghia e focu,
quantu ferruaju turciutu
supra li to' spaddi!

Ora nun ci la fazzu chiù
E lu ting e tang
Di lu me martiddiari
Batti sulu li me uri,
'ncudini mia!

Li brillanti

Nunaju gioielli
e nunaju assai dinari.
Li veri me brillanti
su' l'occhi pi guardari.